

Dithero tsa Tirelano mo Kutlwanong

19/2014 Ka Sontaga o o bidiwang Reminiskere, e le ka 16. 03. 2014

MO LEINENG LA MODIMO O E LENG RARA LE MORWA

LE MOWA O O BOITSHEPO!

1. Sefela sa 27 - 25/24

2. Thapelo: Morena, Modimo o o rategang, re go leboga ka Morwao Jesu Keresete yo o mo re rometseng gore re dumele mo go ene gore re nne le botshelo jo bo sa khutleng, o re thuse, Morena, gore re mo utlwe, re dumele mo go ene ka Lefoko la gagwe, kajeno, le ka malatsi otlhe, ka ntlha ya ga Jesu Keresete, Morena le Mopholosi wa rona. Amen.

3. Epistolo ka fa thulaganyong ya 2 e kwadilwe mo go Baroma 5:1-11;

Efangele ka fa thulaganyong ya 1 e kwadilwe mo go Mareko 12:1-12.

4. A go ipolelwe tumelo ya bokeresete!

5. Sefela sa 113 - 106/102

6. Thapelo ya mmadi wa thero.

7. Epistolo ka fa thulaganyong ya 6 e kwadilwe mo go Bahebere 11:8-10, e re: "Ke ka tumelo Aborahame a neng a utlwa, jale fa a bidiwa go hudugela kwa lefatsheng le o tla le ruang go nna boswa, mme a huduga, a sa itse kwa a yang teng. Ke ka tumelo, fa a ne a ya go jaka kwa lefatsheng le a le solofeditsweng, e ise e nne la gagwe, a nna mo ditenteng, a na le Isaka le Jakobe, barua-boswa nae ba yona tsholofetso eo; gone o ne a lebeletse motse o o nang le metheo, o morulaganyi le moagi wa ona e leng Modimo." Amen.

8. Thero: Barategi mo Moreneng wa rona Jesu Keresete, kajeno ke Sontaga o o bidiwang Reminskere. Lefoko leo le re: Gopola! Ka fa lefokong la ntlha la beke eno le le reng: "MORENA, gopola mautlwelobotlhoko a gago le maitshwarelo a gago, gone a ntse a le teng ka bosenatshimologo!" Ka ntlha ya mautlwelobotlhoko le maitshwarelo a gagwe Morena o utlwa thapelo ya rona. Mo Lefokong la thero le re tswang go le utlwa re utlwa tse tharo:

1. Sa ntlha: Kutlo;

2. Sa bobedi: Tumelo;

3. Sa bofelo: Motse o o nnelang ruri.

1. Barategi, re utlwa ka ga rralosika wa rona, e bong Aborahame, yo o neng a bidiwa ke Modimo gore a tswe mo lefatsheng la ga gabo, le mo losikeng lwa ga gabo, a tlogele bontle, molemo, monate, le diphatsiphatsi tsa mo gae la ga gabo. Aborahame o ne a utlwa, a tlhaloganya gore o biditswe ke ene yo e leng ene, a utlwa a na le sebete le kitso gore Modimo o itse tse o di mo baakanyeditseng, a tswa, a tsamaya, a ya mo felong fa a neng a sa go itse, kwa a neng a sa ye gona. Mme bogolo go moo o ne a utlwa Lefoko la Modimo ka kutlo e e siameng.

Go thata mo go kalo mo go rona, fa re bidiwa ke Modimo ka Mowa o o Boitshepo go utlwa, gantsi re ipeela tse di ka thibelang go bidiwa ga rona. Ke gore le fa re utlwa Lefoko, re thiba ditsebe tsa rona, gonne re re: Nako e e tshwanetseng ga e ise e tle, gongwe re re: Nako e e tshwanetseng ga e ise e nne teng gore re simolole botshelo jo bošwa, gongwe re re: Felo kwa go iwang teng, ga go ise go itsiwe. Aborahame o ne a bidiwa, a utlwa. Le rona re tshwanetse go reetsa, le go utlwa Modimo, fa o re bitsa, re ipolele go dirisiwa ke ona.

2. Barategi mo Moreneng, gape re bona tumelo ya ga Aborahame. Go a bonala gore ke tumelo. Tumelo ke se se tlhokegang tota mo pitsong ya gagwe. Ka tumelo o ne a kgona go tswa mo lefatsheng la ga gabo, le go nna mosupi wa Modimo wa nnete mo lefatsheng le a neng a sa le itse. Barategi, Aborahame o ne a sa batle sengwe se a neng a tshwara ka sona, gongwe se se mo supeditseng ka gore bona! Tota Modimo o mpiditse, mme Aborahame o ne a dumela Lefoko le le mmiditseng. Mo go tseo re a ithuta gore tota motho o dumela se a neng a sa se bone, mme ka go utlwa o ne a dumela.

Le kajeno re bona mathata a re kopanang le ona, fa Lefoko la Modimo le rerwa, fa Mowa o o Boitshepo o rata go re sedimosetsa, mme re nne le mangwele a a thata, re akabale, re gake, re ipatlele tse di supang, tse di bonalang gore re biditswe. Re a lebala gore go dumela ke go ikanya tse re sa di boneng, mme tse re di utlwang. Aborahame a tsamaya a na le tumelo e e tlhomameng mo Moreneng, le go ikanya tse di sa feleng.

3. Barategi, sa bofelo se re se utlwang mo Lefokong ke motse o o sa feleng, o Modiri wa ona e leng Modimo. Re a bona, re utlwa ka maikaelelo a ga Aborahame gore o lebeletse motse oo. A lebala manno a sebakanyana sa mono a a agileng mo go ona, mme o ne a eletsa go ya mo

kagong e e sa khutleng. Ke kago e Lefoko le buang ka ga yona, e re tla tsenang mo go yona ka mautlwelobotlho ke maitshwarelo a Modimo a a mo go Jesu Keresete, a re amogelwang ke Modimo ka ntlha ya gagwe ka ona. A re eletseng go tsena mo kagong eo e e sa feleng, e e sa digweng ke motho wa tlhago, mme re dumele mo Modimong o e leng Mong-wa-thata-tsotlhe.

A re gopoleng gore tsotlhe tse re nang natso mo lefatsheng leno ke tsa sebakanyana fela, gape di tla tlogelwa mono. Ka moo a re utlweng Lefoko la Morena, fa a re laletsa ka Lefoko la gagwe re dumele mo go ene, yo o re baakanyeditseng kago eo e e sa feleng ka loso le tsogo ya gagwe, ka go re swela mo sefapaanong, le ka go tsoga ka letsatsi la boraro mo baswing, e bong Jesu Keresete Morena wa rona. Amen

9. Thapelo: Modimo, re a go leboga, ka le rona o re solofeditse legodimo la gago go nna legae la rona ka Jesu Keresete, le gore kwa go lone go tsena fela ba ba dumelang ka tlhomamo go wena. O re thuse ka Mowa o o Boitshepo wa gago gore re tloafalele go gorogela koo re sa le mono lefatsheng, e tle e re motseng re tlogang mono re fiwe boitumelo jo bo feleletseng ka Jesu Keresete Morena wa rona. Amen. Thapelo ya Morena: Rara wa rona yo o mo legodimong ...

10. Sefela sa 106 - 99/99

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke Mandla Tshwala ka ngwaga wa 2007.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.